



Engola il luf nies spazi da viver?

«La libertad ei in animal miraculus che fa tema a biars carstgauns.» Cun quels plaids dil cantatur Georg Danzer ha il moderatur dil Forum per la cultura dalla pasch a Glion beneventau mesjamma var 30 participontas e participonts ad ina discussiun davart il luf cun la sora dominicana Ingrid Grave ed il cusseglier naziunal Martin Candinas.

MARTIN GABRIEL/FMR

«Jeu sun surstaus che Vus fageis ils medems quitaus sco jeu pervia dil luf». Quei ha *Martin Candinas* getg pliras gadas a sora *Ingrid Grave* durant la spassegiada entuorn Glion. Fertion che sora Ingrid ha raquintau da sias temas e da ses discurs cun ina pura da nuorsas che fa quitaus pervia dil luf, ha Martin Candinas rapportau da sias experientschas politicas en connex cul luf. Gia cuort suenter la partenza dall'excursiun, eisi stau clar, ch'ei vegn buca a dar ina discussiun controversa davart il luf. Biaronz han ils dus protagonistas dalla spassegiada mess el center igl aspect dalla pasch denter animal e carstgaun e la damonda, tgi che ha il dretg sil spazi da viver.

Francestg d'Assisi e la pasch denter luf e carstgaun

Il luf seigi in animal miraculus, scrivon ils organisateurs dalla spassegiada el program. Purs, catschadurs e biaras persunas privatas vesien il luf sco inimitg. Ed en l'invitaziun sedamond'ins, sch'il luf hagi meritau quella rolla?

Sora Ingrid Grave ha detg, che la derasaziun dil luf el Grischun seigi inacceptabla per ella. El medem mumment s'engaschi ella denton per in dialog. «Jeu less metter a cor a tuts l'enconuschenta legenda da Sogn Francestg d'Assisi ed il luf da Gubbio. Francestg haveva contonschiu ch'il luf che scarpava nuorsas, era vegnius dumastics e diventaus siu amitg.» Clar, che quei seigi ina legenda naiva, ha la sora dominicana manegiau. Mo cun il dialog constructiv havessi ins forsa success. Martin Candinas ha concediu ch'ei hagi dau ina polarisaziun ella discussiun cunzun denter populaziun dils marcaus ella Bassa e la populaziun dalla muntogna. «Las discussiuns davart il luf ein per part plein odi. Jeu survegnel mintg'janna mails e brevs cun cuntegns che jeu less buca numnar cheu.» Ad interim seigi ei aschia ch'ils lufs semultiplichschien aschi fetg ch'els vegnien a sedomicilar era ella Bassa. Forsa ch'il dialog sin palancau naziunal daventi pli constructivs sche la populaziun dils marcaus e dalla Bassa fetschi era experient-

schas directas ella confruntaziun cul luf, ha Candinas detg. Cert ei che omidus protagonistas da l'excursiun entuorn Glion han negins problems fundamentals cun l'existenza digl animal scarpont. Ton Grave sco Candinas ein denton dil meini ch'ei hagi memia biars lufs e che quels stoppien vegnir decimai ton pli spert.

Participonts interessai

Ils dus acturs principals dalla spassegiada dil forum per la pasch ein vegni confruntai cun pliras damondas dils participonts e dallas participontas.

Anavos el museum ha in in manegiau ch'il cusseglier naziunal hagi giu in sempel giug oz. «Ei setracta buca ton dil sempel giug, mobein dalla moda e maniera co ina tematica difficila sco quella dil luf vegn discutada», ha in'otra participonta manegiau.

Sora Ingrid Grave e Martin Candinas han en mintga cass resentiu il discurs sco interessants ed adattaus per quei forum che metta era la discussiun pascheivla e constructiva el center.



Martin Candinas e sora Ingrid Grave duront la spassegiada.

FOTO MARTIN GABRIEL